

प्रमुख समाचार –

- 1— केंद्र सरकार ह आज केंद्रीय करमचारी अउ पेंसनभोगी मन बर आठवां वेतन आयोग के गठन के घोसना करीन।
- 2— बीजापुर जिला म सुरक्षा बल अउ माओवादी मनके बीच होय मुठभेड़ म अब तक दू जिन माओवादी मनके मारे जाय के खबर हे— इही जिला म माओवादी मन कोति ले लगाय गे आईईडी चपेट म आय ले दू जिन जवान मन घायल हो गेहे।
- 3— भाजपा कोति ले प्रदेश म मंडल अउ जिला म चुनई प्रक्रिया ल पूरा करे के बाद काली सत्रह जनवरी के नवा प्रदेश अध्यक्ष के घोसना करे जाही।

वेतन आयोग—गठन

केंद्र सरकार ह आज केंद्रीय करमचारी अउ पेंसनभोगी मन बर आठवां वेतन आयोग के गठन के घोसना करीन हे। सूचना अउ प्रसारण मंत्री अश्विनी वैष्णव ह किहीन कि सातवां वेतन आयोग के कार्यकाल ह दू हजार छब्बीस के खतम होवइया हे अउ अभी आठवां वेतन आयोग के गठन ले वेतन पैनल के सिफारिस मिले बर पर्याप्त समय मिलही। ओमन ह किहीन हे कि आयोग के अध्यक्ष अउ दू जिन सदस्य के नियुक्ति जल्दी करे जाही।

मंत्रिमंडल फैसलें

प्रधानमंत्री नरेंद्र मोदी के अध्यक्षता म आज केंद्रीय मंत्रिमंडल के बइठक होइस। बइठका के बाद सूचना अउ प्रसारण मंत्री अश्विनी वैष्णव ह किहीन हे कि मंत्रिमंडल ह स्पेस सेक्टर ल लेके बड़े फइसला लेहे। बछर दू हजार चालीस तक भारत के चांद म पहुंचे के लक्ष्य म तीसर लांच पैड के अहम भूमिका होही। ओमन ह किहीन हे कि तीन हजार नौ सौ पचयासी करोड़ रुपिया के लागत ले तीसर लांच पैड ल मंजूरी दे गेहे।

इसरो—स्पेडेक्स

भारतीय अंतरिक्ष अनुसंधान संगठन— इसरो ह आज स्पेडेक्स मिसन के तहत दू ठिन उपग्रह के डाकिंग प्रक्रिया ल सफलता पूर्वक संपन्न करे हे। प्रधानमंत्री नरेंद्र मोदी ह इसरो के वैज्ञानिक अउ उपग्रह के अंतरिक्ष डाकिंग के सफल प्रदर्शन बर अंतरिक्ष दल ल बधई दे हे। एक ठिन सोसल मीडिया पोस्ट म प्रधानमंत्री ह किहीन हे कि ए मिसन ह अवइया बछर म देस भर के महत्वाकांक्षी अंतरिक्ष मिसन बर महत्वपूर्ण कदम साबित होही।

मुख्यमंत्री विष्णुदेव साय ह ए ऐतिहासिक उपलब्धि बर इसरो के जम्मो टीम अउ देसवासी मन ल बधई दीन। ओमन ह किहीन हे कि प्रधानमंत्री नरेंद्र मोदी के दूरदर्सी नेतृत्व म भारत ह अंतरिक्ष के क्षेत्र म सरलग आगू बाढ़त जात हे।

सीजीपीएससी-मामला-सीबीआई चालान

छत्तीसगढ़ लोकसेवा आयोग- घोटाला मामला म सीबीआई ह आज रईपुर के बिसेस कोर्ट चार सौ पन्ना के चालान पेस करीस। जानबा के अनुसार चालान म सीजीपीएससी के तत्कालिन चेयरमैन टामन सिंह सोनवानी, बजरंग पावर के डायरेक्टर श्रवण कुमार गोयल अउ ओखर परिवार के सदस्य मन ल मुख्य आरोपी बनाय गेहे। टामन सोनवानी के भतीजा नितेश सोनवानी अउ साहिल सोनवानी, श्रवण कुमार गोयल के बेटा शशांक गोयल अउ बहू भूमिका कटियार उपर घलो गंभीर आरोप हवय। एखर अलावा तत्कालिन डिप्टी एग्जाम कंट्रोलर ललित गणवीर के खिलाफ घलो चालान पेस करे गेहे। ए मामला म सीबीआई ह आरोप लगाय हे कि सबो आरोपी मन ह मिल के सीजीपीएससी भर्ती परीक्षा के प्रक्रिया म गड़बड़ी करके चयन प्रक्रिया ल प्रभावित करीन। संगेसंग परीक्षा म हेरफेर करे बर पइसा के लेनदेन घलो करीन। सबो आरोपी मन ल तीस जनवरी तक न्यायिक रिमांड म भेज दे गेहे। अब ए मामला के सुनवाई तीस जनवरी के होही।

भाजपा प्रदेश अध्यक्ष-घोषणा

भारतीय जनता पार्टी कोति ले प्रदेश म मंडल अउ जिला म चुनई प्रक्रिया ल पूरा करे के बाद काली सत्रह जनवरी के नवा प्रदेश अध्यक्ष के घोसना करे जाही। अध्यक्ष पद बर आज संज्ञा पांच ले सात बजे तक नामांकन दाखिल करे जात हे। भाजपा के प्रदेश प्रभारी नितिन नबीन ह बतइन कि भारतीय जनता पार्टी के ए ह स्वस्थ लोकतांत्रिक परंपरा हे, जेमा बूथ अध्यक्ष ले लेके राष्ट्रीय अध्यक्ष तक के चुनई होथे।

मन की बात

प्रधानमंत्री नरेंद्र मोदी ह ईतवार उन्नीस जनवरी के आकाशवाणी ले “मन की बात” कारीकरम करइया हे। मासिक रेडियो कारीकरम के ए ह एक सौ अट्ठारवां कड़ी होही। कारीकरम बर बिचार अउ सुझाव टोल फ्री नंबर- एक आठ सून्य सून्य- एक एक-सात आठ सून्य सून्य म भेजे जा सकत हे। सुनइया मन ल बतादन कि नरेंद्र मोदी ऐप या फेर माई जीओवी ओपन फोरम म घलो अपन बिचार भेज सकत हे। एखर बर काली सत्रह जनवरी तक सुझाव ल स्वीकार करे जाही।

आईईडी विस्फोट-जवान घायल

बीजापुर जिला म आज माओवाद मन कोति ले लगाय गे आईईडी के चपेट म आय ले कोबरा बटालियन के दू जिन जवान मन ह घायल होगे हे। दूनों जवान मन ल गोड़ अउ चेहरा म चोट आइस हे। जिला के पुलिस अधीक्षक जितेन्द्र यादव ह बतइन कि बासागुड़ा थाना क्षेत्र के पुतकेल ले सीआरपीएफ अउ कोबरा के दूनो टीम ह तलासी अभियान बर निकले रिहीन। इही बेरा म दू जिन जवान मन आईईडी के चपेट म आ गे। जेखर बाद जवान मन ल बढ़िया इलाज खातिर रईपुर लाय गेहे। दूनो जवान मन ह खतरा ले अब बाहिर बताय जात हे।

ऐति, इही जिला के पुजारी कांकेर अउ मारुड़बाका के बीच सुरक्षा बल अउ माओवादी मनके बीच होय मुठभेड़ म दू जिन माओवादी मनके मारे जाय के खबर हे। जानबा के अनुसार दक्षिण बस्तर के जंगल म माओवादी मनके होय के सूचना म डीआरजी, कोबरा बटालियन अउ सीआरपीएफ के संयुक्त टीम ह तलासी अभियान म निकले रिहीस, फेर तमे माओवादी मनके संग उखर मुठभेड़ होगे रिहीस।

उहें, कोंडागांव जिला म आज पांच लाख रुपिया के एक झिन इनामी माओवादी ह आत्मसमर्पण करे हे। ए माओवादी उपर कोंडागांव, कांकेर, नारायणपुर, बस्तर, दंतेवाड़ा अउ बीजापुर जिला ले लगे जघा म कतकोन मुठभेड़ म सामिल होय के आरोप हे। ए माओवादी ह भरमार बंदूक, हैण्डग्रेनेट अउ देसी लॉन्चर बनाय के संगेसंग आने हथियार के मरम्मत के जानकार हे। आत्मसमर्पण करइया माओवादी ल राज्य सरकार के पुनर्वास नीति के चलत पच्चीस हजार रुपिया के प्रोत्साहन रासि दे गेहे।

मुख्यमंत्री हेलमेट-अपील

प्रदेस म मनाय जात छत्तीसवां राष्ट्रीय सड़क सुरक्षा माह के चलत मुख्यमंत्री विष्णुदेव साय ह आज रईपुर म आयोजित बाईक रैली म सामिल होइन अउ लोगन मनले यातायात नियम के पालन करे बर किहीन हे। संगेसंग ओमन ह दूपहिया गाड़ी चलइया मन ल हेलमेट लगाय बर जागरूक होय के संदेस घलो दीन। ए बेरा म मुख्यमंत्री ह बाईक रैली ल हरा झंडी दिखाके रवाना करीन। कारीकरम म स्वयंसेवी संस्था मन ह नुक्कड़ नाटक ले यातायात नियम के पालन करे ले होय वाले फायदा के बारे म लोगन मन ल जागरूक करीन।

बतादन कि ए राष्ट्रीय सड़क सुरक्षा माह ह इक्तीस जनवरी तक मनाय जाही।

महाकुंभ स्पेशल ट्रेन

महाकुंभ मेला के चलत रेलयात्री मनके सुविधा बर दक्षिण पूर्व मध्य रेलवे कोति ले दुरुग कटनी के दू जोड़ी कुंभ मेला स्पेशल ट्रेन चलाय जात हे। ए ट्रेन ह रईपुर, उसलापुर, पेण्ड्रा रोड, अनूपपुर, शहडोल, उमरिया, न्यू कटनी जंक्सन ले चलाय जात हे। दुरुग-कटनी, दुरुग स्पेशल ट्रेन इक्तीस जनवरी, पांच अउ अट्ठाईस फरवरी के दुरुग ले रवाना होही। ए गाड़ी म चार सामान्य कोच, चौदह सिलीपर कोच, दू एसी कोच समेत बाईस कोच के सुविधा होही।

उहें, प्रयागराज महाकुंभ म छत्तीसगढ़ के रहइया लोगन मन बर राज्य सरकार कोति ले छत्तीसगढ़ पवेलियन बनाय गेहे। ए पवेलियन ह महाकुंभ मेला के सेक्टर छै म बघाड़ा थाना मेला करा हवय। जेमा स्थानीय संस्कृति ल बढ़ावा देवत हुए लोगन मन बर निसुल्क रूके अउ खाय के घलो बेवस्था करे गेहे। श्रद्धालू मन ह इलाहाबाद यूनिवर्सिटी के रक्षा ले दारागंज होत हुए पुराना लोहा के यमुना ब्रीज क्रास करके इंहा पहुंच सकत हे।

ठगी आरोपी-गिरफ्तार

सक्ती जिला के बाराद्वार पुलिस ह लोन दिलाय के नांव म लाखो रुपिया के धोखाधड़ी करइया सुशील सुमन नांव के आरोपी ल गिरफ्तार करे हे। सारंगढ़-बिलाईगढ़ के रहइया आरोपी ह खुद ल लोन ऑफिसर बताके ठगी करत रिहीस। ए मामला म पुलिस ह दू झिन आरोपी ल पहिली ही गिरफ्तार कर चुके हे।

संक्षिप्त समाचार

— राज्यपाल रमेन डेका ह प्रोफेसर डॉक्टर रवि रत्न सक्सेना ल दुरुग जिला के पाटन स्थित महात्मा गांधी उद्यानिकी अउ वाणिकी विश्वविद्यालय के कुलपति नियुक्त करे हे ।

— उप मुख्यमंत्री विजय शर्मा ह आज कबीरधाम जिला के पहिली महिला थाना के उद्घाटन करीन ।

